

दिनांक 02.12.2023

समय: 18.50 बजे

आकाशवाणी जयपुर-अजमेर

प्रादेशिक समाचार

- राज्य मांय 199 विधानसभा हलकां सारू पड़्या वोटों री गिणती काल संवारे 8 बज्यां ऊं करी जावेला-प्रदेश भर मांय वोटों री गिणती रा 4 हजार ऊं बत्ता राउंड व्हेला।
- वोटों री गिणती री ठौड़ां अर आरे-सारे रा हलकां मांय हिफाजत रा पुख्ता इंतजामात करी ज्या।
- सोमवार ने सरू व्हे रह्या संसद रा सिंयाळू सत्र ने ध्यान राखता थकां दिल्ली मांय सगळी सियासी पार्टियां री मीटिंग बुलायी ज्यी-सरकार हर मुद्दा माथे चर्चा सारू तैयार

अर

- प्रदेश मांय ठण्ड रो असर बधबा अर कोहरा ऊं जिन्दगी माथे असर पड़्यो -हनुमानगढ मांय पारो उतर र 8 दशमलव 6 डिग्री सेल्सियस दर्ज करी ज्यो।

000

राज्य मांय विधानसभा चुनाव सारू पड़्या वोटों री गिणती री सगळी तैयारियां कर लीरीजी है। राज्य रा मुख्य निर्वाचन अधिकारी प्रवीण गुप्ता आज वोटों री गिणती ऊं जुड़्या संवाददाता सम्मेलन मांय कह्यो के वोटों री गिणती बिना गलती तुरत करण सारू बारीकी ऊं काम करी ज्यो है।

.....
मुख्य निर्वाचन अधिकारी प्रवीण गुप्ता बतायो के 199 विधानसभा निर्वाचन हलकां सारू 36 केंद्रां माथे वोटों री गिणती करी जावेला। वे बतायो के राज्य मांय निषेधाज्ञा लागू है, ई कारण किण ई ने जूलूस या यात्रा निकाळबा री मंजूरी नीं व्हेला। इण ऊं पैली प्रवीण गुप्ता सियासी पार्टियां रा नुमाइन्दां सागे मीटिंग कर र वां ने वोटों री गिणती री पूरी प्रक्रिया अर नियमां रा बारा मांय जाणकारी दीनी।

जयपुर, जोधपुर अर नागौर मांय दो-दो केंद्रां परां अर बाकी ठौड़ां एक-एक केंद्र माथे वोटों री गिणती करी जावेला। राज्य रा 51 हजार 890 मतदान केंद्रां माथे ईवीएम मांय पड़्या वोटों री गिणती सारू 2 हजार 524 टेबल लगाई ज्यी है। आं वोटों री गिणती रो काम 4 हजार 245 राउंड मांय पूरो व्हेला। पेश है म्हाणा खबरनवीस री रपट -

.....

वोटां री गिणती काल संवारे 8 बज्यां सरू व्हेला। सब ऊं पैली डाक मत पत्रां अर ई पाछे ईवीएम रे जरिये पड्या वोटां री गिणती करी जावेला।

डूंगरपुर मांय वोटां री गिणती श्री भोगीलाल पंड्या राजकीय महाविद्यालय मांय करी जावेला। ई सारू जिला निर्वाचन विभाग री ओर ऊं हिफाजत र पुख्ता इन्तजामात करी ज्या है। भरतपुर अर डीग जिला री सीटां सारू वोटां री गिणती भरतपुर रा महारानी श्री जया कॉलेज मांय करी जावेला। श्रीगंगानगर जिला री 3 अर अनूपगढ जिला री दो विधानसभा सीटां सारू पड्या वोटां री गिणती श्रीगंगानगर रा डॉ. भीमराव अम्बेडकर राजकीय महाविद्यालय मांय व्हेला। वोटां री गिणती सारू करी ज्या तैयारियां रो आज जिला निर्वाचन अधिकारी अंशदीप, निर्वाचन आयोग कानी ऊं लगायी ज्या पर्यवेक्षक डॉ. रामास्वामी एन., डॉ. करुणा, डॉ. श्रीधर चेरुकुरी, रणवीर शर्मा अर हर्षा एस. शेटी जायजो लीनो अर जरूरी हुकम दीना। जिला निर्वाचन अधिकारी बतायो के वोटां री गिणती ऊं जुडी ताजा जाणकारी श्रीगंगानगर रा सूचना केन्द्र ऊं दी जावेला।

000

000

सूचना अर प्रसारण मंत्री अनुराग ठाकुर कह्यो है के राज्य मांय कांग्रेस ऊं परेशान व्ही जनता ई दफा भाजपा री सरकार बणावण रो फैसलो कर लीनो है। वे आज अजमेर मांय खबरनवीसां सागे बातचीत कर रह्या हा। वे राज्य मांय भाजपा रो राज पाछो आवण री सूरत मांय पेपर लीक अर भ्रष्टाचार रा मामलां री जांच करायी जावेला अर दोषियां ने करडी सजा दिरायी जावेला। वे कह्यो के राज्य मांय लारला पांच साल मांय भ्रष्टाचार, अपराध अर अराजकता रो माहौल रह्यो ज्यीं माथे भाजपा री सरकार बण्या पाछे आंकस लगायो जावेला।

000

राष्ट्रपति द्रौपदी मुर्मू कह्यो है के आर्टिफिशियल इंटेलिजेंस सरीखी एक मद नुवी तकनीक ने जिन्दगी बेहतर बणावण सारू काम ली जा सके है। राष्ट्रपति आज राष्ट्र संत तुकड़ोजी महाराज नागपुर विश्वविद्यालय रा दीक्षांत समारोह मांय बोल रही ही। वे कह्यो के आर्टिफिशियल इंटेलिजेंस काम लेवण ऊं जिन्दगी आसान बण रही है पण डीप फेक सारू इण ने काम लेवणो समाज सारू खतरो है। ई मौके राष्ट्रपति विद्यार्थियां ने डी.एस.सी. अर पी.एचडी. री उपाधि दे र नवाजा।

000

उपराष्ट्रपति जगदीप धनखड कह्यो है के हाल रा बरसां मांय भारत री माली व्यवस्था अर दुनिया मांय भारत रो मान अर भरोसो केई गुणा बध्यो है। वे आज नई दिल्ली रा आकाशवाणी मांय प्रतिष्ठित डॉ. राजेन्द्र प्रसाद स्मारक व्याख्यान मांय बोल रह्या हा। उपराष्ट्रपति कह्यो के एक दशक पैली भारत री माली व्यवस्था कमजोर मानी जाती ही, जद के आज आ दुनिया री पांचवीं मोटी माली व्यवस्था है।

धनखड कह्यो के सार्वजनिक बुनियादी ढांचा अर डिजिटल चुकारा रा हलका मांय केई उपलब्धियां हासिल कीनी है।

000

केन्द्र सरकार कह्यो है के वा संसद रा सोमवार ऊं सरु व्हे रह्या सिंयाळू सत्र मांय हर मुद्दा माथे चर्चा सारु तैयार है। संसद रा दोन्यू सदनां री कार्यवाही सही ढंग ऊं चलावणो तैय करण सारु सरकार आज नई दिल्ली मांय सगळी सिंयासी पार्टियां रा नेतावां री मीटिंग बुलाई। मीटिंग पाछे संसदीय कार्य मंत्री प्रहलाद जोशी कह्यो के सरकार सगळी पार्टियां ऊं संसद री कार्यवाही ठीक ढंग ऊं चलावण मांय मदद करण री अपील कीनी है। बे बतायो के सिंयाळू सत्र मांय 19 बिलां माथे चर्चा करी जावेला।

.....
संसद रो सिंयाळू सत्र 22 दिसंबर ताई चालेला। 19 दिन रा ई सत्र मांय संसद री 15 बैठकां व्हेला। ओ सत्र 17वीं लोकसभा रो आखिरी पूर्णकालिक सत्र व्हेला। सत्र रा पहला दिन तृणमूल कांग्रेस री सांसद महुआ मोइत्रा माथे रकम ले र सवाल पूछण रा आरोप रा सिलसिला मांय आचार समिति री रपट लोकसभा मांय पेश करी जावेला।

000

प्रदेश मांय ठण्ड मांय बधोतरी अर कोहरा रे कारण जिन्दगी माथे असर पड रह्यो है। हनुमानगढ मांय आज पारो उतर र 8 दशमलव 6 डिग्री सेल्सियस दर्ज करी ज्यो। सीकर मांय न्यूनतम तापमान साढे 9, चूरु मांय 10 दशमलव 2, फतेहपुर मांय 10 दशमलव 6 अर सिरौही मांय 11 दशमलव 3 डिग्री सेल्सियस तापमान दर्ज करी ज्यो। राज्य रा ऊगणी हलकां मांय कठे-कठे हल्की बिरखा व्ही। कोहरा रे कारण दूर ताई निजर नी आवण रे कारण आवण-जावण माथे असर पड्यो। प्रदेश रा ऊगणी अर उत्तराद हलकां मांय रेलगाडियां मोड़ी चाल रही है। घणा कोहरा रे कारण अजमेर रा रूपनगढ मांय आज संवारे स्कूल बस अर दूजी बस री टक्कर रे कारण एक बच्चा अर बस चलावण वाळा री मौत व्हे गयी। हादसा मांय बच्चां अर मुसाफिरां समेत 35 जणा जख्मी व्हे ग्या, ज्यां रो ईलाज अजमेर रा जवाहरलाल नेहरू अस्पताल मांय करी ज्यो। ई बीचे भीलवाड़ा रा सांसद सुभाष बहेड़िया जिला कलेक्टर ने कागद लिख र ठण्ड रा बधता असर ने ध्यान राखता थकां स्कूलां रो समय बदली करण री मांग कीनी है।

000

राजस्थान कर्मचारी चयन बोर्ड, जयपुर न्यारी-न्यारी भर्ती परीक्षावां मांय फर्जी उम्मीदवारां ऊं परीक्षा दिलवा र चुणी ज्या 6 जणां रे खिलाफ पुलिस मांय मामलो दर्ज करवायो है। इण ई साल 10 अक्टूबर ने बोर्ड 15 उम्मीदवारां रे खिलाफ पीटीआई भर्ती परीक्षा 2022 मांय फर्जी उम्मीदवारां कानी ऊं इम्तिहान देवण री शिकायत परां मुकदमों दर्ज करवायो हो, जिण री जांच पुलिस कर रही है। बोर्ड रा अध्यक्ष मेजर जनरल आलोक राज सगळा उम्मीदवारां अर वां रा मायतां ने उम्मीदवारां कानी ऊं खुद इम्तिहान देवण सारु अर ऐडो नी व्हेवण री सूरत मांय करडी कानूनी कार्यवाही सारु चेताया है।

000

1971 मांय भारत अर पाकिस्तान बीचे व्ही लडाई री वर्षगांठ मनावण सारु फौज री सप्त शक्ति कमान री 12वीं कोर री ओर ऊं 04 ऊं 16 दिसंबर ताई मल्टी मॉडल अभियान चलायो जावेला। अभियान रा हिस्सा रा तौर ऊं मोटरसाईकिल रैली, कार रैली, साइकिल रैली, कैमल सफारी, सेलिंग, हाफ मैराथन, स्टोरी बोर्ड जुलूस अर स्काई डाइविंग समेत न्यारा-न्यारा कार्यक्रम राख्या जावेला।

000